

# CONCURSO DE DEBUXOS “QUEN É TORIBIO?”

*Ilustra unha das historias da serie de Casares e gaña un premio*

---

## CONVOCATORIA\_\_\_\_\_>

Este ano, *Toribio*, o famoso personaxe da serie de cinco contos que Carlos Casares comezou a publicar en 1991 na editorial Galaxia, cumpre trinta anos. Foi ilustrado por Penélope Ares, que deu vida os pequenos heroes Toribio, de 8 anos, e a súa amiga Sara, de 7; e moitos máis persoeiros e inventos que tantas aventuras lles procuraron aos nosos protagonistas.

Para recordar este feito, o Concello de Xinzo de Limia e a Fundación Carlos Casares convocan a III edición deste concurso, co ánimo de celebrar os nosos queridos amigos Toribio e Sara, e os seus compañeiros de aventuras (Papafigovich, Pardau, Smith, ...) e convidan a todos os nenos e nenas dos centros escolares da Limia para que presenten debuxos que reflectan, á súa maneira, algunha das historias que aparecen na célebre serie.

## BASES\_\_\_\_\_>

- DESTINATARIOS E CATEGORÍA:** Alumnado dos centros escolares da comarca da Limia en tres categorías segundo o curso:
  - PRIMARIA:**
    - 1) Primeiro e Segundo, ou [A1]
    - 2) Terceiro e Cuarto, ou [A2]
    - 3) Quinto e Sexto, ou [A3]
  - SECUNDARIA:**
    - 1) Primeiro e Segundo, ou [B1]
    - 2) Terceiro e Cuarto, ou [B2]
- FINALIDADE E FORMATO:** A finalidade do concurso é ilustrar algunha das pasaxes ou historias que aparecen en calquera dos cinco libros da serie: *Este é Toribio*; *Toribio contra o profesor Smith*; *Toribio e o contador de contos*; *Toribio ten unha idea*; e mais *Toribio revoluciona o tráfico*.

O formato da ilustración será en DIN A4 ou tamaño folio, en papel ou cartolina, con calquera técnica artística que conforme a ilustración (pintura, collage, debuxo...), podendo ser un único debuxo ou unha viñeta sempre que se manteña o formato dun folio ou un DIN A4.

As obras deberán ser orixinais, en lingua galega e non poden ter sido premiadas anteriormente noutros concursos. Só se admitirá unha obra por concursante.

3. **PRAZO DE RECEPCIÓN E MODO DE ENVÍO:** A convocatoria estará aberta **do 16 de abril ao 28 de maio de 2021**.

As obras deberán enviarse dentro nun sobre pechado grande, no que se porá tamén un sobre pequeno que conteña unha folla cos datos da autoría:

- A. Nome completo e apelidos
- B. Título da obra
- C. Enderezo e teléfono de contacto do pai, nai ou titor da persoa participante.

O sobre grande debe ser anónimo, é dicir, **nunca** levar o nome do concursante. Debe levar:

- Enderezo de envío:

**Oficina de Cultura - Casa da Cultura de Xinzo de Limia  
R/ Curros Enríquez, 17 (Praza Carlos Casares)  
36320 XINZO DE LIMIA**

- E debaixo:
  - Nome do concurso ao que se presente a obra.
  - Título da obra que se presenta.
  - Categoría na que se concursa, é dicir, cal das cinco anteriores.

O sobre grande así identificado pode entregarse de tres maneiras:

- Enviarse por correo postal.
- Entregarse na Oficina da Casa de Cultura.
- Entregarse na Secretaría do centro escolar.

4. **XURADO E CRITERIOS DE VALORACIÓN:** O xurado estará composto por:

- A. A alcaldesa de Xinzo de Limia ou persoa en quen delegue.
- B. O presidente da Fundación Carlos Casares ou persoa en que delegue.
- C. O pintor Antón Pulido.
- D. Unha profesora de debuxo de centros escolares da Limia.
- E. Un secretario, con voz pero sen voto.

Premiarase a creatividade, a orixinalidade, o equilibrio e composición dos traballos e os recursos técnicos empregados. O premio non poderá ser declarado deserto.

5. **PREMIOS:** Para cada unha das dúas categorías de idade establécense os seguintes recoñecementos:
- A. Primeiro premio de cada categoría: diploma e un vale regalo de 150 euros.
  - B. Segundo premio de cada categoría: diploma e un vale regalo de 100 euros.

**Os premios deste concurso fallaranse durante o mes de xuño de 2021. Anunciarase coa debida antelación o lugar, data e hora da entrega dos premios.**

6. **PUBLICIDADE DOS TRABALLOS E DEREITOS:** Coa entrega dos traballos cédese o dereito a darlles publicidade e de seren amosados nas páxinas web da Fundación Carlos Casares e do Concello de Xinzo de Limia, así como nos espazos físicos desas entidades chegado o caso.

O autor ou autora da obra é o único responsable do que nela se inclúa. Os organizadores declinan toda a responsabilidade legal sobre o seu contido.

A participación neste concurso supón a plena aceptación destas bases. Ante calquera dúbida, prevalecerá a opinión do xurado. Salvo petición por escrito, non se devolverán os traballos presentados, que quedarán recollidos no arquivo da Fundación Carlos Casares. O Concello de Xinzo e a Fundación Carlos Casares reservan o dereito, nun futuro, da publicación das obras gañadoras nas distintas edicións, previa petición formal aos gañadores.

\* \* \*